



SAOPŠTENJE ZA MEDIJE

Dana **06.02.2018. godine, utorak**, navršava se **deset godina** od ubistva Denisa Mrnjavca. Tim povodom, na tramvajskom stajalištu „Tehnička škola“ u pravcu Ilidže bit će upriličen skup i položit će se cvijeće ispred fotografije Denisa Mrnjavca.

Podsjećanja radi, Denis Mrnjavac bio je dječak, srednjoškolac od 16.godina koji je, na povratku iz škole kući, brutalno pretučen u prepunom tramvaju, prilikom čega su mu nanesene teške tjelesne povrede od kojih je 06.02.2008.godine i preminuo.

Nakon punih deset godina, **Denis je postao sinonim za nasilje nad djecom** koje se provodi na ulicama našeg Grada i Domovine. Nasilje nema naciju, nema vjeru i nema religiju. Nasilje nema dob, godine, spol, ni svrhu, niti cilj! Nasilje postaje broj, odupire se razumijevanju i zdravom razumu, ne suzbija se represijom i čini se da društvo zabavljeno samim sobom, te na nasilje nema pravi odgovor.

Nasilje je svrha samo sebi i ima samo posljedice, krv, bol i duboku tragediju. Nažalost, nasilju, čini se, nema ni kraja... Svaki dan, u svim dijelovima našeg grada i naše zemlje neki mladi ljudi i životi bivaju ugroženi i ugašeni kao rezultat nekog **novog „starog“ nasilja**.

I nakon deset godina podnošenja inicijativa i usmenih obećanja vlasti, nismo uspjeli realizovati ideju da se obližnji park napravi kao spomen trg, mjesto na kom bi se odala počast našem Denisu, kao i svim žrtvama poslijeratnog nasilja nad djecom i mladima. Taj trg imao bi svrhu **stalne opomene** da se na nasilje treba reagovati, da svi izgubljeni mladi životi na ulicama našeg Grada nisu i neće biti zaboravljeni!

Nažalost, na nasilje reagujemo tek kad se dogodi, kad pokaže svoje ružno lice i kad čujemo za još jednu žrtvu. Tada se ponovo zabrinemo, pričamo o preventivi, o reagiranju, knjiškim i akademskim floskulama **i sve se vrlo brzo zaboravi** da bi nas novi nasilni čin trgnuo iz uronjenosti u svakodnevicu i pokazao nam da ništa od onoga što smo pričali nema smisla ako se konačno i odlučno nešto i ne poduzme.

Borba protiv nasilja počinje u porodici, nastavlja se u vrtiću i školi, traje kroz cijeli život i nikada ne prestaje.

Borba protiv nasilja ne može se i ne smije prepustiti bilo kojoj instituciji; **to mora biti i jeste dužnost svakog čovjeka.**

Niko nije pošteđen, niko nije siguran i niko nije imun na nasilje.

Samo je pitanje vremena, prilike i okolnosti.

Nasilnici su među nama – oni čekaju !

Dana 06.02.2018. godine, utorak, planirano je:

- **u 11 sati:** polaganje cvijeća na tramvajskoj stanici kod Američke ambasade (Tehnička škola) u pravcu Ilidže,
- **u 14:00 sati:** posjeta Denisovom vječnom počivalištu u Lepenici,

Ispred Udruženja mladih „Denis Mrnjavac“ i ispred Denisove obitelji:
svi ljudi dobre volje su dobrodošli!

UDRUŽENJE MLADIH „ DENIS MRNJAVAC“